

KRONIKK

Send kronikkforslag til

i.myking@forskerforbundet.no

Kronikkens lengde må ikke overstige 10 000 tegn, inkludert mellomrom. Bidrag som trykkes honoreres med kr. 2.000,-

Forskningspolitikk, kollegial kritikk og eigedomsrett til kunnskap om genar

«Det beste systemet vi kjenner for kvalitetskontroll av forsking er kollegial kritikk. Med patentrettar til genetisk kunnskap vil kollegial kritikk måtte komme i etterkant», skriv professor Erling Berge i månadens kronikk. «Særleg er dette eit problem fordi vi veit svært lite om genar generelt og spesielt om korleis kunstig tilførte genar fungerer i naturlege økosystem», meiner Berge.

EU SITT PATENTDIREKTIV (Direktiv 98/44/EF) vert framleis drafta både i EU og i Noreg. Direktivet om rettsleg vern av bioteknologiske oppfinningar går i hovudsak ut på at det skal være same høve til å få patent på oppfinningar knytt til biologisk materiale som på anna materiale. Eit viktig argument for å gi patent ligg i å auke tilgangen på privat kapital som kan forske fram nye produkt. Offentlege forskningsbudsjett strekk ikkje til for meir enn å skrape i overflata av genekunnskapen. Slik som på andre område vil forskingsinnsatsen auke om private er villeg til å investere i forsking. Gjennom patentet får bedrifta ein tidavgrensa eigedomsrett til den genetiske kunnskapen dei har skaffa fram. Dette vil vi normalt sjå som rett og rimelig. I dei fleste høve vil både bedrifta og samfunnet tene på ordninga.

DET KAN LIKEVEL vere interessant å tenkje litt vidare omkring korleis ein genetisk ressurs fungerer og kva farar som kan ligge i den aukande bruken av patentrettar. Problemet er nemleg ikkje berre fordelinga av moelege inntekter frå bruken av kunnskapen. I debatten om forvaltninga av generessursane er det mange som ikkje tenkjer over at sett som ressurs har kunnskapen om genane i ulike organismar heilt andre eigenskapar enn det vi tradisjonelt tenkjer på som nasjonen si felleseige. Dersom vi t.d. samanliknar oljeresursane og generessursane, vert det feil. Å tildele eigedomsrettar til olje fungerer annleis enn å gjere det same med kunnskap om genar. Når vi tappar ut eit fat olje frå reservo-

ret, minkar det med olje. Andre kan ikkje seinare tappe den oljen som vi tappar i dag. Slik er det ikkje med genane. Om nokon plukkar med seg ein sopp frå Hardangervidda eller ein mikroorganisme frå eit av korallrevå våre, vert det ikkje mindre genetiske ressursar verken på vidda eller i havet. Ein annan vil ha like stor sjanse til å hauste av den genetiske kunnskapen. Vi vert med andre ord ikkje fattigare verken no eller i framtida om nokon forsyner seg av generessursane våre. Forvalningsprinsippa for olje kan dermed ikkje vere retningsgjevande for hausting av generessursen. Fordi om eigedomsregimet for olje har fungert bra, kan vi ikkje frå det tru at eit tilsvarannde regime for genar også vil fungere bra. Sidan generessursane ikkje vert "brukt opp" burde i og for seg alle og einkvar kunne forsyne seg så lenge det skjer med varsemid i høve til sjeldne organismar, og dei som nyt tar kapital til å utvikle nye produkt basert på denne kunnskapen, burde få vern for produksjon for ei avgrensa tid. Kva er så problemet?

EIT PROBLEM SOM HAR vore framme, er tilhøvet til Biodiversitskonvensjonen og fordelinga av dei inntekter som generessursane er opphav til. Mange finn det urimeleg at dei menneskja som er knytt til planter og dyr gjennom tradisjonell bruk og vanleg avlsarbeid ikkje skal få del i dei goda som utvikling av nye produkt fører til. Dei kan til og med i somme situasjonar bli hindra i vidare avlsarbeid. Det kan derfor vere viktig at vi erklærer nasjonal eige av genetisk kunnskap om organismar frå norsk natur. Det kan motver-

ke somme urimelege fordelingsmessige konsekvensar av dagens praksis og gi oss eit innatak til styring med våre lokale generessursar. Dei fordelingsmessige problema ein synest sjá, ligg dels i at lovverket i somme land i dag er så generelt at det vert mogeleg å profittere på patentering av eksisterande produkt som ris eller laks. Dei fleste vil finne dette urimeleg. Det er derfor truleg at ein vil kunne finne fram til eit lovverk som gjer slike situasjonar umoglege. Det verkelege problemet ligg etter mange si mening på eit anna plan: patentering og storskalabruk av genemodifiserte organismar.

PROBLEMET LIGG I den grunnleggjande mangelen på innsikt i korleis bruken av den genetiske kunnskapen verkar på naturlege økosystem. Vi veit svært lite om genar generelt og spesielt om korleis kunstig tilførte genar fungerer i naturlege økosystem. Og å skaffe fram slik kunnskap er svært kostbart. Problemet med manglande kunnskap er mest akutt i høve til genemodifiserte organismar som skal nyttast i stor skala på landjorda eller i sjøen. Vanlegvis vil all bruk av ny kunnskap ved sida av tilsikta verknader, ha utilsikta og uventa verknader. Stundom vil uønska sideverknader overgå dei tilsikta. Det finst praktisk tala ikkje kunnskap om korleis dei nye geneelementa vil fungere i den nye økosystem-samanhengen der den genemodifiserte organismen vert plassert. Det er imidlertid påvist at virus kan ta opp i seg genelement frå ein vertsart og sannsynlegvis kunne føre det over til ein annan art. Ein reknar det i dag som truleg at geneelement kan vandre sideveis i økosystemet. Dette er for så vidt ein normal del av naturen. Det spesielle med dei genemodifiserte organismane er et med desse fører inn eit framandelement i økosystemet. Vi har i dag ikkje kunnskapsgrunnlag for å gjette på korleis nye geneelementet vil kunne påverke

«Vi har i dag ikkje kunnskapsgrunnlag for å gjette på korleis nye geneelemente vil kunne påverke andre artar»



«Mengda av forskarar med eit kritisk perspektiv på genetisk modifikasjon av organismar veks langt frå like raskt som mengda av forskarar som har genemodifisering som levebrød»

andre artar. Normalt er det ikkje grunn til å vente noko som helst slags verknad. Men sjansen for at det kan gå skikkeleg galt, er i alle fall større enn null og konsekvensane om det skulle gå skikkeleg gale, er potensielt svært store. Det er all grunn til å freiste vere føre var.

I DEI FØRSTE generasjonane av genemodifiserte organismar nyttar ein som hjelpemiddel i overføringsprosessen av nye genar, eit genelement som koda for antibiotikaresistens. I den ferdige genemodifiserte organismen vart dette elementet ståande sjølv om det ikkje var del av dei eigenskapane hos den nye organismen ein var ute etter. Dette vart kjent. Kritiske forskarkollegaer reiste spørsmål om antibiotikaresistensen kunne overførast til bakteriar og bli ein meir "normal" del av naturlege økosystem og dermed gjere medisinsk bruk av antibiotika vanskelegare. Dette førte sjølv sagt til at bruken av nett dette genelementet vart stoppa. Eksempellet kan illustrere fleire sider av det problematiske med patentrettar til genetisk kunnskap.

NORMAL FORSKING med publisering vil gjøre det umogeleg å ta patent på den publi-

serte kunnskapen. Når kunnskapen er publisert, er den tilgjengeleg for alle som kan ha nytte av den. Når målet med forskinga er å skaffe seg patent på kunnskap, kan ein derfor ikkje publisere før ein sender inn patentsøknaden. Forskinga vert hemmeleg til ein meiner ein er framme ved noko patenterbart. Genemodifiserte organismar med antibiotikaresistente gen var alt sett ut da det vart reist spørsmål om kor klokt dette var.

PUBLISERING OG KOLLEGIAL kritikk av planar og praksis er ein vesentleg del av samfunnets kvalitetskontroll av nyvinningar. Ingen forskar eller forskargrupper veit alt om det dei driv med. Det beste systemet vi kjenner for kvalitetskontroll av forsking, er kollegial kritikk. Med patentrettar til genetisk kunnskap vil kollegial kritikk måtte komme i etterkant. Det kan vere for seint og sjansen for at kritikken skal komme, synest vere minkande. Mengda av forskarar med eit kritisk perspektiv på genetisk modifikasjon av organismar veks langt frå like raskt som mengda av forskarar som har genemodifisering som levebrød. Den auka innsatsen i kunnsapsproduksjonen gjeld nemleg ikkje kunnskap om konsekvensar.

Både hemmeleg forsking og mangel på tidleg kollegial kritikk vil auke risikoen for uventata og uønske konsekvensar av at nye gen vert sett inn i nye samanhengar. I tillegg må vi også ta med at motivasjonen for å gje patentrettar på genar nett var å auke kunnsapsproduksjonen. Auka fart i kunnsapsproduksjonen fører til fleire og oftare høve der noko kan gå galt både i forskingsprosessen og i den kommersielle bruken av kunnskapen.

VED SIDA AV DEI urimelege fordelingsmessige konsekvensane som dagens praksis av patentlovgjevinga gir, er det altså grunn til å legge vekt på at tildeling av patent på kunnskap om genar gir oss ein ukjent auke i risikoen for uønska endringar i naturlege økosystem. Å ta bort patentrettane på genetisk kunnskap vil ikkje setje risikoen til null, men det vil redusere den. Alt i alt trur eg vi burde skunde oss noko langsamare i produksjonen av genetisk kunnskap, eller i det minste auke forskingsinnsatsen på konsekvensar minst tilsvarande den på patenterbar kunnskap.

Erling Berge er professor ved Institutt for sosIOLOGI OG STATSVITENSKAP, NTNU.